

ԳԱԳԻԿ Ի ԲԱԳՐԱՏՈՒՆՈՒ ՊԻՋՈՒ ՔԱՂԱՔԸ

Մ. Հ. ՃԵՎԱԶԻՐՃՅԱՆ

Կապագովկիայի բյուզանդական Պիզու քաղաքի անունը սերտորեն նկատված է հայ Բագրատունիների թագավորության տիրույթները և Անին կորցրած Գագիկ II-ի իշխանության վերջին 34 տարիների (1045—1079 թթ.) ընթացքում տեղի ունեցած դեպքերի հետ:

Պատմիչները աղոտ տեղեկություններ են տալիս Պիզուի մասին: Նրանցից ոչ մեկը չի հաղորդել տեղագրական որևէ տվյալ: XIX—XX դդ. պատմաբաններ էդ. Դյուլորիեն¹, Հ. Մանանդյանը², Ա. Ալպոյաճյանը³, Մ. Օրմանյանը, Տրդատ Եպս. Պալյանը և ուրիշներ ապարդյուն փորձեր են կատարել գտնելու Պիզուի տեղը: Հավանության արժանի չէ գոյություն ունեցող այն կարծիքը, թե Փոքր Հայքի Եվդոկիա (այժմ Թոքատ) քաղաքի մոտակա Պիզերի (Պիզեռի, Պիձեռի, Պիզարե, Պիժառու) գյուղը և նրա Ս. Խաչ վանքը Գագիկ II-ի՝ որպես ավատ ստացած Պիզուն և նրա Ս. Խաչ վանքն են: XI դարում Փոքր Հայքում Բյուզանդիայի կայսրից որպես ավատ Սենեբերիմ Արծրունու, Դավիթ Արծրունու, Գագիկ Աբասյանի և Գագիկ Բագրատունու ստացած տիրույթների դիրքի ուսումնասիրությունից պարզվել է, որ Գագիկ II-ը ոչ մի ժամանակ Թոքատի շրջակայքում հողեր չի ունեցել:

Տրդատ Պալյանը կարծիք է հայտնել, թե Կեսարիայից արևելք գտնվող էքրեկ (Ագարակ) բնակավայրը Պիզուն է, քանի որ էքրեկի շուրջ գոյություն են ունեցել 60—70 հայաբնակ գյուղեր, իսկ գավառը կոչվել է Պոզուխ կամ Պոզուր: Դրանից էլ ենթադրել է, որ Պոզուխը՝ Պիզուի աղավաղված ձևն է: Պոզուխը ծագում է ոչ թե Պիզու, այլ Պոզ-Օք ձևից, որը հին թուրքական մի ցեղախմբի անունն էր: Այդ տեղանունը գործածվել է Կապագովկիայում թուրքերի հաստատվելուց հետո: էքրեկից մի քանի կիլոմետր հեռու գտնվում է Մելիքզադի գյուղը, որը միջնադարյան Մամնդավն է: Ուստի անտեղի է Պիզուն փնտրել էքրեկում՝ Մամնդավի մոտերքում, Պոզուխի գավառում⁴:

Պիզուի մասին ամենավաղ տեղեկությունը գտնում ենք Կ. Պոլսի «Ղալաթիայի Ազգային մատենադարանի» ձեռագրերից՝ «Պատմություն Եփեսոսի ժողովոյն» աշխատությունում: «Սահմանք ժողովոյն» վերնագրի տակ զեր-

¹ E. Dulaurier. Recherches sur la chronologie Arménienne, t. I, Paris, 1859, էջ 285:

² Հ. Մանանդյան, Քննական տեսություն հայ ժողովրդի պատմության, հատ. Գ, Երևան, 1952, էջ 27:

³ Ա. Ալպոյաճյան, Պատմություն հայ Կեսարիո, հատ. Ա, Գաֆրե, 1937, էջ 428: Երևանի՝ Պատմություն Եվդոկիո հայոց, Գաֆրե, 1952, էջ 500:

⁴ Ա. Ալպոյաճյան, Պատմություն հայ Կեսարիո, Ա, էջ 428: Բարգև Ա կաթողիկոս, Պատմություն կաթողիկոսաց Կիլիկիո, Անթիլիաս, 1939, էջ 630:

ված է հետևյալը. «Խնդրոյ զիր, զոր Եպրես վերատեսուչն Բիզայու և Արկադիուպոլսոյ, և Կիրեղ վերատեսուչն Կելոյ մատուցին սուրբ ժողովոյն»⁵:

Նույն պատմութեան մի ուրիշ ձեռագիր ընդօրինակութեան մեջ տեղանունները գրված են նաև «Բիւզայու, Կէլոյ և Կիրդոս»⁶ ձևով:

Ինչպես երևում է, Եփեսոսի եկեղեցական ժողովի (431 թ.) մասնակիցներից մեկը եղել է Պիզուն և Արկադիուպոլիսը ընդգրկող եկեղեցական թեմի առաջնորդը: Պիզուի վերակառուցման մասին հետևյալն է գրել Ասողիկը. «Լևոն⁷, սա շինեաց զԲիւզու (Բիզու) և զԱրկադուպոլիս և զԿամառախ ՚ի մկն (816) թուականին»⁸: Կիրակոս Գանձակեցին ևս ունի նույն բովանդակութեամբ մի նշում⁹:

Վերոհիշյալ բոլոր բնակավայրերը գտնվում էին Կեսարիայի շրջակայքում, Արգեսոս (այժմ՝ էրճիսզաղ, 3916 մ) լեռան մոտ:

Պիզուի անունը հիշվում է նաև VIII դարում Բյուզանդական կայսրութունում ծայր առած պատկերապաշտութեան և ներքին խռովությունների կապակցությամբ: Կոստանդին V Կոպրոնիմոս (741—775 թթ.) կայսեր անևր և օպսիկիոն թեմի ստրատեգ հայազգի Արտավազդը, հայերի և համախոհների օգնությամբ 16 ամիս տիրել էր Կոստանդնուպոլսին ու հռչակվել կայսր: Սակայն հաջող մարտերից հետո Կոստանդին V-ը մտնում է մայրաքաղաք և փախուստի մատնում Արտավազդին: 743 թ. Արտավազդ կայսրը և նրա օգնական Վասակ պատրիկը քաշվում են հայաշատ Պիզու: Վերջնական հաղթանակից հետո Կոստանդին V-ը սպանում է նրանց¹⁰:

Կոստանդին IX Մոնոմախ կայսեր կողմից Պիզուն և Կալոն Պաղատը (Καλον Παλατιον) Գագիկ II-ին տալուց (1045 թ.) 230 տարի առաջ քաղաքն արդեն մի անգամ վերակառուցված բնակավայր էր:

Պիզուի դիրքը որոշելուն նպաստող երկու տեղեկություն կա, որոնցից մեկը Գագիկ II-ի՝ Կենդրոսկավի բերդում սպանվելու դեպքի քննարկման ընձեռած տվյալներն են: Երկրորդ տեղեկությունը տալիս է սելջուկյան արքունի քարտուղար Իբնի Բիբին՝ 1254 թ. Կոնիայի սելջուկյան զահի շուրջ սուլթան Իզզալդին Քեյքավուս II-ի և սուլթան Ռյուկնալդին Կլըջ-Արսլան IV-ի միջև տեղի բռնեցած զահակալական երկպառակությունների մասին գրած հատվածում: Այդ կապակցությամբ նա նկարագրել է սուլթան Ռյուկնալդին IV-ի փախուստը Կոնիայի արքունի պալատից Դեվելու: Իբնի Բիբին իր աշխատությունում նշել է սուլթան Ռյուկնալդին IV-ի երթուղին¹¹: Սուլթանը նախ գնացել է Կոնիայի և Կեսարիայի միջև ընկած Արքունի ճանա-

⁵ Բ ա Ր Վ ե ն ա թ ո ա կ ի ց կ ա թ ո ղ ի կ ո ս, Յուցակ Անագրոսյ Ղալաթիո Ազգային մատենադարանի Հայոց, Անթիպաս, 1961, էջ 229:

⁶ Նույն աղբյուր, էջ 92:

⁷ Լեոն V Հայազգի (813—820 թթ.), Բյուզանդիայի կայսր:

⁸ «Մոսեփանոսի Տարօնեցոյ Ասողկան Պատմութիւն տիեզերական», Ս. Պետերբուրգ, 1865, էջ 143:

⁹ Կ ի Ր ա կ ո ս Գ ա ն ճ ա կ ե ց ի, Պատմութիւն Հայոց, աշխատ. Կ. Ա. Մեխր-Օհանջանյանի, Երևան, 1961, էջ 76:

¹⁰ Հ. Գ ե լ ց ե Ր, Համառոտություն բյուզանդական կայսրների պատմության, Վաղարշապատ, 1901, էջ 161: Հ. Ա ճ ա ո յ ա ն, Հայոց անձնանունների բառարան, հատ. Ե, Երևան, 1962, էջ 46: «История Византии», т. 2, М., 1967, էջ 56:

¹¹ «İbni Bibinin farsçadan muhtasar Selçuknâmesinden», Ankara, 1941, çev. M. N Gencosman, էջ 250—252:

պարհով (Ուլու-յուլ), որը անցնում էր Սուլթանհանը, Ակսարայ, Հոջամեսուտխանը (այժմ՝ Աղղըկարախան), Օրեսունխանը, Ալայխանը, Աճըղյուլ, Մոսքարա (այժմ՝ Նեվշեհիր), Կյուսլ (այժմ՝ Ürgüç րյւն. Աշ. Иргюц) լինակավայրերով: Կյուսլը անցնելուց հետո սուլթան Ռյուկնալդինը թողել է Արքունի ճանապարհը և թեքվել գեյի հարավ, անցել է Բիզ (Պիղու) բնակավայրով և հասել Դեվելու (Խավատաներ, այժմ՝ Դեվելի գյուղակ): Սուլթանը մի գիշերվա ընթացքում Կոնիայից հասել էր նորակառույց Հոջամեսուտխան: Ցերեկը կողմնակի աչքերից թաքնվելու և հանգստանալու համար իջեանել էր այդ կարավանատանը: Հոջամեսուտխանը կառուցվել էր 1241 թ.: Դա հոյակապ մի շինություն էր: Այսօր դեռ գոյություն ունի նրա անխնամ մնացած շենքերի համալիրը: Արքունի ճանապարհի վրա գտնվող Օրեսունխանը կառուցված էր 1236 թ., իսկ Ալայխանը՝ 1200 թ.: Սուլթան Ռյուկնալդինը երկրորդ գիշերվա ընթացքում կտրել-անցել էր Հոջամեսուտխանից Դեվելու ընկած ճանապարհի երկրորդ հատվածը: Գոյություն ունեւ Ակսարայից Դեվելու տանող երկրորդ մի ճանապարհ, որն անցնում էր Նազիանզով և Մալակոպեայով, սակայն դա ձեռնտու չէր սուլթանի համար, քանի որ այդ ճանապարհի վրա գտնվող հանգրվանների օժտված չէին ճամփորդին բավարարող համապատասխան ծառայություններով: Ըստ Լեռույթին XIII դարում Պիղուում եղել է ճամփորդներին ծառայություններ մատուցող հիմնարկ՝ կարավանատուն, ձիեր փոխելու կայան, ճաշարան, շուկա, բաղնիք և այլ կառույցներ: Եթե նկատի ունենանք, որ Բյուզանդիայի Լեոն V կայսեր վերակառուցած Պիղուն շենացել էր համապատասխան շինություններով, իսկ Գագիկ II Բագրատունին կառուցել էր Ս. Խաչ վանքը և ուներ իր դիրքին համապատասխան ապարանք, ապա կարելի է պատկերացնել, որ միջնադարյան Պիղուն ունեցել է բարվոք վիճակով կապաղովկյան փոքր մի քաղաքի տեսք: Այն ունեցել է նաև տրանզիտային էշանակություն:

Իբնի Բիբիի «Սելջուկնամեում» Պիղուի անունը աղավաղված ձևով է տրված արաբերենի տառադարձության պատճառով: Բացի այդ, սելջուկ-թուրքերը, որոնք տիրել էին այդ կողմերին, 165 տարիների ընթացքում տեղանունները փոխել և իմաստավորել էին ըստ իրենց լեզվի պահանջների: Հետագայում Պիղուի անունը կրկին փոխվել է և այժմ կոչվում է Բաշքոյ (Başköy): Գտնվում է Հոգուղաղ (1938 մ) լեռան հյուսիս-արևելյան լանջին, ծովի մակերևույթից մոտավորապես 1700 մ բարձրության վրա: Բնակավայրի մոտ սկիզբ է առնում Ալիս գետի ձախակողմյան վտակներից մեկը, որն անցնում է Բաշքոյի միջով ու Յուրգյուբի մոտով և Ալիս գետին է խառնվում Ավանոսից (այժմ՝ Գյուլշեհիր) արևելք: Պիղուն գտնվում է Արդևոսի դաշտում՝ Ալիս գետի ջրավազանը, Լիկաոնիան և Գաղատիան իրար միացնող ճանապարհների հանգուցային մի վայրում: Պիղուից Կիլիկյան դոները տանող մի ճանապարհ անցնում է Կիզիստուայով (այժմ՝ Եշիլհիսար) և Կենդրոսկավիով (այժմ՝ Զենգիբարկալե): Այս վերջին հանգամանքը կապվում է Պիղուի դիրքը որոշելուն նպաստող այն տեղեկության հետ, որը առնչվում է 1079 թ. Կենդրոսկավի բերդում Գագիկ II թագավորի սպանվելուն: Հայտնի է, որ 1079 թ. Գագիկ II-ը 1000 ղինվորներով գնացել էր Տարսոն՝ Կիլիկիայի բյուզանդական կուսակալ Այլըղարիպ Արծրունուն տեսույթյան, Գագիկ II-ի որդի Դավիթը Այլըղարիպ Արծրունու փեսան էր: Այդ մասին Վարդան Բարձրբերդցին գրել է. «...ղորդին իւր կրտսեր տայ ՚ի փե-

սայութիւն Ապլխարիպ որդւոյ խաչկայ՝ իշխանին Վասպուրականի, որ ընդ ձեռամբ ունէր զՍիս, զԱտանայ, զՊապառսն և զԼամբրոն, զոր ստեւաց և եղ ՚ի բանտի: Եւ լուեալ հօրն զնաց հանել զնա, և ՚ի դառնալն՝ յիջևանս խեղդեցին զնա Հոռոմբ: Եւ պիղծն Ապրիխարիպ սպան դեղով զփեսայն»¹²:

Գագիկ II-ի սպանութեան դեպքը խոր արձագանքներ է թողել: Միջնադարի բազմաթիւ հայ ժամանակագիրներ անդրադարձել են դրան: Նրանց յիշատակում իրար լրացնող տեղեկութիւնները լուսաբանում են սպանութեան դեպքի հետ առնչվող մանրամասնութիւնները: Մատթեոս Ուռհայեցի գրում է. «... և դարձաւ Գագիկ որպէս առիւծ մոնղոլով, վասնզի էր մեծ և հզօր և արքայ և կալեալ զամենայն իշխանս գաւառին՝ վարէր զնոսա երկաթի կայանօք առաջի իւր. և եկեալ հազար արամբ ՚ի դաշտն Առժախոսայ ՚ի բերդն՝ որ ասի Կիզիստրայ...»¹³: «Եւ յայնժամ աստուածասպան ազգն Հոռոմոց լարով աղեղան խեղդեցին զթագաւորն Հայոց և կախեցին զնա ընդ սլարիսպն...»¹⁴:

Սմբատ սպարապետը, հաւանքելով իր ժամանակը բանավոր և գրավոր տեղեկութիւնները, կազմել է բոլորից հարուստ և ընդարձակ հետեւյալ վկայութիւնը. «՚ի թուին ՇԻԸ. (1079)... զնաց Գագիկ արքան բազում զօրոք ՚ի մայրաքաղաքն Տարսոն առ Ասլղարիպ իշխանն Հայոց, յաղագս խնամութեան ինչ բանի՝ կոչմամբ Ասլղարիպն. և յաղագս պատճառի ինչ իրիք ոչ եղև զործ խնամութեան: Եւ դարձաւ Գագիկ լի բարկութեամբ, մոնղոլով, և եկեալ դաշտն Առժախոս և ընդ նմա ո (1000) հեծեալ, մերձ ՚ի բերդն որ կոչի Կիտոսկապի: Եւ էին տէրք բերդին Յոյնք գ (3) եղբարք որդիք Մանտալէի: Եւ Գագկայ թողեալ զզօրս իւր խոտորեցաւ ՚ի ճանապարհէն զարամբք և ելանէր առ նոսա ՚ի տեսս. իսկ նոքա յառաջագոյն նենգութեամբ դարանամուտ եղեալ Գագկայ ծ (50) ձիաւորով, և յորժամ մերձ եղև ՚ի բերդն Գագիկ, գային գ եղբարքն Յոյնք յերկրպագութիւն նմա. և Գագիկ խոնարհեալ առ նոսա ՚ի համբոյր, և նոքա կալան զպարանոցն նորա և քարշեցին ՚ի վայր յերկավարէն, և ելեալ դարանքն և առին զԳագիկ և ածին ՚ի բերդն ՚իտոսկապի, և յորժամ լուսն զօրքն նորա՝ ցրուեցան և յետ ը (8) ատուր ժողովեցան ՚ի վերայ բերդին ամենայն տունն Հայոց, Գագիկ որդի Աբասայ և ամենայն ցեղն: Սինաբերիմայ, Ատոմ և Ապուսահլ և ամենայն իշխանքն Հայոց, և զաւուրս բազումս նեղեցին զբերդն և ոչ կարացին ինչ առնել. և իշխանքն որք կալան զԳագիկ՝ ոչ համարձակեցան թողուլ. զոր և ...: Եւ յայնժամ աստուածուրացքն խեղդեալ զթագաւորն Գագիկ և կախեցին զնա ընդ սլարիսպն զօր մի, և ապա հանեալ արտաքոյ բերդին թաղեցին. զոր յետ զ (6) ամսոյ եկեալ այր մի ՚ի քաղաքէ նորա Բանիկ անուն, դողացեալ զմարմինն Գագկայ տարաւ իւր և յազգն, և արարին ՚ի վերայ նորա կոծ մեծ աղղն Հայոց և թաղեցին զնա ՚ի վանս իւր Պիզու»¹⁵:

Սմբատ սպարապետը ճշգրտորեն տեղադրել է այն բերդը, ուր սպանվել է Գագիկ II-ը. «... յորդուցն Մանտալէի յգ եղբարցն: Սոքա ունէին ամուր բերդ մի մօտ ՚ի Չկնջուրն, վերահայեաց յաշխարհին Գամրաց, որ էր անուն բերդին Կենգոսկաւի»¹⁶:

¹² «Մեծին Վարդանայ Բարձրերդեցոյ Պատմութիւն տիւղերական», Մոսկւա, 1861, էջ 141:

¹³ Մատթէոս Ուռհայեցի, Ժամանակագրութիւն, Վաղարշապատ, 1898, էջ 219:

¹⁴ Նույն տեղում, էջ 220:

¹⁵ Սմբատ սպարապետ, Տարեգիրք, Վենետիկ, 1956, էջ 86—87:

¹⁶ Նույն տեղում, էջ 136:

Գագիկ II-ի և Ապլղարիայ Արծրունու՝ Տարսոնում կայացած հանդիպման բնույթը շատ հեռու էր խնամիական լինելուց: Գագիկ II-ը նպատակ ունեւր բյուզանդական տարածքում ստեղծել հայկական պետականություն, բանի որ դա վերացել էր բուն Հայաստանում՝ բյուզանդական դիվանագիտական մեքենայությունների, սելջուկ-թուրքերի ռազմական հաջող գործողությունների և հայ իշխանավորների վարած կենտրոնախույս քաղաքականության պատճառով:

Ապլղարիայ Արծրունին հավատարիմ էր մնում կայսեր: Իսկ Գագիկ II-ը կորցրել էր թագավորությունը: Նա իր որդի Դավթին ամուսնացրել էր Կիլիկիայի բյուզանդական կուսակալ Ապլղարիայ Արծրունու դստեր հետ, հույս ունենալով, որ կարելի կլինի ժառանգական կապերի շնորհիվ Կիլիկիայում ստեղծել հայկական իշխանություն, նախ՝ Բյուզանդիայից՝ կախյալ, ապա՝ անկախ: 1071—1080 թթ. Փոքր Ասիայում տիրող խառն իրադրության պատճառով Բյուզանդիայի դրությունը վատացել էր: Դա հուսադրում էր հայ իշխաններից շատերին: Սելջուկ-թուրքերը արագությամբ շարժվում էին դեպի արևմուտք՝ գրավելով Բյուզանդական կայսրության երկրամասերը: Հայաստանից գաղթած և Փոքր Ասիայում բնակություն հաստատած հայ թագավորների և իշխանների տիրույթները վտանգի տակ էին: Նրանք՝ կարծելով, որ քրիստոնյա իշխանության տակ ապահով կլինեն, ժամանակին իրենց հայրենական տիրույթները զիջել էին բյուզանդացիներին: Սակայն դեպքերի ընթացքը չարդարացրեց հայ իշխանավորների հույսերը: Գագիկ II-ը և նրա բախտակիցները շտապում էին օգտվել առիթից: Ապլղարիայ Արծրունին, գնահատելով սելջուկ-թուրքերի ռազմական կարողությունը և առավելությունը, բյուզանդական իր տիրույթներում համալրումներ էր կատարում՝ Կիլիկիայում հայ իշխանական ընտանիքներ բնակեցնելով: Դրանց թվում կարելի է նշել Համբրոնի Օշինյան, Բազե բերդի տեր Բազունի, Նաթանաիլյան, Բարձրբերդի, Պռականու և մյուս իշխանական տների անունները: Սելջուկ-թուրքերի առաջխաղացման պատճառով ոտքի տակ էր գնալու նաև Գագիկ II-ի տիրույթը՝ Պիզուից և Կալոն Պաղատից բաղկացած փոքր գավառը: Հետագայում հնարավոր էր, որ սելջուկ-թուրքերը անցնեին Տավրոս լեռների պատվարը և թափանցեին Կիլիկիա:

Ապլղարիայ Արծրունին հենվում էր Բյուզանդիայի վրա և համարվում էր վստահելի իշխան: Նա ուներ մեծ տիրույթ, Իսկ Գագիկ II-ի ունեցածը միայն կորած թագավորական մի տիրույթ, մի կսուր հողամաս և փոքրաթիվ զորք էր: Բացի այդ, կայսեր համար Գագիկ II-ը անցանկալի անձնավորություն էր:

Ապլղարիայ Արծրունին չէր ուզում խաղի մեջ դնել իր կարողությունը, նա մեկ անգամ արդեն զրկվել էր Վասպուրականի Թոռնավան տիրույթից, երբ թուրքերը հարձակվել էին և գրավել այն: Նրկյուղելով իշխանությունը կրկին կորցնելու վտանգից, Ապլղարիայը կտրուկ կերպով հակառակվել էր Գագիկ II-ի ծրագրին: Ապահովության համար նա բանտարկել էր իր փեսային՝ Գագիկ II-ի որդի Դավթին: Պատմագիրների տեղեկություններից պարզվում է, որ Տարսոնում կայացած հանդիպումը այնքան էլ խնամիական ավարտ չի ունեցել: Այդ պատճառով Գագիկ II-ը իր հետ տարած 1000 զինվորների օգնությամբ կալանավորում է Ապլղարիայ Արծրունու տիրույթներում գտնվող իշխաններին և «երկաթի կապանօք» բռնում-տանում Պիզու կամ Կալոն Պաղատ՝ իբրև պատանդ իր որդու՝ Դավթի փոխարեն: Ապլղարիայ Արծրու-

նին լուր է ուղարկում Տարսոնից Պիղու կամ Կալոն Պաղատ տանող ճանապարհի վրա գտնվող բյուզանդական բերդերի իշխաններին, որպեսզի բռնեն Գագիկ II-ին, Դա Կենդրոսկավի բերդի մոտ հաջողվում է Գագիկ II-ի հարևան Մանտալյան իշխաններին, Հանդամանքների բարդացման պատճառով Գագիկ II-ը սպանվում է աղեղի լարով և կախվում բերդից, նրա կալանավորած իշխանները ազատվում են: Գագիկ II-ի դիակը, մեկ օր կախված մնալուց հետո, թաղում են բերդից դուրս: Վեց ամիս անց պիղուեցի մի մարդ, բանիկ անունով, գիշերով հանում է Գագիկ II-ի դիակը և տանում թաղում Պիղուի գագկաշեն Ս. Խաչ վանքում: Իսկ Ասլղարիս Արծրունին թունավորում է իր սևփական Պապեռոն բերդում բանտարկված Դավթին:

Գագիկ II-ը Կիլիկիայում կալանավորած իշխաններին բաժնետարկելու կարող էր տանել միմիայն իր տիրույթում գտնվող մի ամրոց՝ Պիղու կամ Կալոն Պաղատ և ոչ թե մի այլ, թեկուզ հայ, իշխանավորի տիրույթում գտնվող վայր: Կենդրոսկավի բերդը, ուր սպանվել է Գագիկ II-ը, մեզ ծանոթ է այժմ Զենգիբարկալի անունով: Պատմագիրներից Մատթեոս Ուռհայեցու կարծիքով Գագիկ II-ի սպանությունը կատարվել է Կիզիստոս¹⁷ բերդում: Սակայն դա ճիշտ չէ: Կիզիստոսն գտնվում էր Կենդրոսկավից մի քանի կիլոմետր հյուսիս, այն այժմ կոչվում է Նշիլհիսար: 1079 թ. Կիզիստոսն ևս պատկանում էր Մանտալյան իշխաններին և հենց այդ հանգամանքն էլ շփոթություն է առաջացրել:

Գագիկ II-ի երթը եղել է Տարսոն (այժմ՝ Թարսուս), Պողանտը, Կեմեր-հիսար, Նիյդե, Միսլիհան, Զենգիբարկալե, Նշիլհիսար ճանապարհով: Կիզիստոսում Գագիկ II-ի ղեկավարած ճանապարհը բաժանվում էր երկուսի: Դեպի արևելք թեքվողը տանում էր Խավատանք և ապա՝ Կեսարիա քաղաքները: Իսկ դեպի հյուսիս ուղղված մյուս ճանապարհը հասնում էր արդի Ինճեսու բնակավայրը և այնտեղից բաժանվում տարբեր ուղղությունների: Ինչպես հայտնի է, 1079 թ. Խավատանքը դեռևս պատկանում էր նախկինում Կարսի թագավոր Գագիկ Աբասյանին¹⁸: Այդ իսկ պատճառով Գագիկ II-ը «Երկաթի կապանօք» կալանավորված իշխաններին բանտարկելու համար չէր կարող ընթանալ Կիզիստոսից դեպի արևելք՝ Խավատանք տանող ճանապարհով: Հետևաբար՝ Գագիկ II-ի տիրույթները գտնվում էին Կենդրոսկավից և Կիզիստոսից դեպի հյուսիս, Արգևոս լեռից ու Կեսարիա քաղաքից արևմուտք, «ղաշտն Առճիասու» շրջանում:

Մենք կարծում ենք, որ Գագիկ II-ին տրված միջնադարյան Կալոն Պաղատ քաղաքը արդի Ինճեսուն է: Հունարեն Կալոն Պաղատ (Καλὸν Παλλὰς) նշանակում է «զեղեցիկ ակ, աղվոր ջուրի հոր, անուշ ջրի աղբյուր»: Թուր-

¹⁷ Մ. Ուռհայեցի, էջ 219:

¹⁸ Մանագլեբրտի հաղթանակից հետո, 1072 թ. Կեսարիան և Ծամնգավր մտել էին Գալիլեան իշխանության (1067—1175 թթ.) սահմանների մեջ: Դրա պատճառով կաթողիկոս Գրիգոր Բ Վկայասերը (1066—1105 թթ.) ստիպված եղավ կաթողիկոսական աթոռը Ծամնգավից փոխադրել Մուտառասունի վանքը: Ինչ տարի (1072—1081 թթ.) այդտեղ էր գտնվում հայոց կաթողիկոսի պաշտոնական նստավայրը: Ուստի՝ Գագիկ Աբասյանի Կեսարիայի և Ծամնգավի տիրույթները 1079 թ. առաջ զրավված էին թուրքերի կողմից: 1079 թ. Կապադովկիայում, բյուզանդական կղզիացած հատուկներ բերդատեր իշխաններ ղեկավարում էին սելջուկյան և դանիշմանյան զորքերի ճնշման դեմ: Դրանց թվում էին նաև Մանտալյան իշխանները, Գագիկ II-ը, Գագիկ Աբասյանը, Ռուրեն իշխանը և մյուսները:

քերեն ինճեսու (incesu) նշանակում է «բարակ ջուր կամ վտակ, նուրբ կամ անուշ ջուր, աղվոր ջուր», մի իմաստ, որը տալիս է նաև հունարենը։ Աստերևույթին, ինճեսուն թարգմանությունն է Կալոն Պաղատի։ Ինճեսուն գտնվում է տարանցիկ ճանապարհների հանգույցում, այնտեղով են անցնում Կեսարիայից դեպի արևմուտք՝ Լիկաոնիա և հարավ՝ Կիլիկիա առանող տարանցիկ ճանապարհները։ Ինճեսուն բանուկ երթևեկություն է ունեցել նաև անցյալում, այնտեղ եղել է բերդ։ Այդ իսկ պատճառով մենք կարծում ենք, որ Գագիկ II-ի նստավայր Կալոն Պաղատը գտնվում էր Ինճեսունում։ Սելջուկ սուլթանների կառուցել տված Արքունի ճանապարհը ևս անցնում էր Ինճեսունով։ Այսօր իսկ այդ քաղաքը վերոհիշյալ ճանապարհների խաչմերուկում կարևոր հանգրվան է և ունի շուրջ 6500 թուրք բնակիչ։

Յուրգյուբից արդի Բաշքյոյի (սելջ. Բիզ, Պիզու) վրայով Դեվելի տանող վերոհիշյալ ճանապարհը մեջտեղում հատում է Եշիլհիսարից ինճեսու տանող ուղին։

Գագիկ II Բագրատունու Կապադովկիայի տիրույթը գրավում էր էրճիասդաղ և Հոդուլդաղ լեռների և Կուրբաղագյուլու լճի ու դրանից հյուսիս գտնվող ճահճի միջև ընկած «դաշտն Առճիասու»¹⁹ կոչվող հովիտը, այժմյան Ինճեսու գյուղաքաղաքով ու Բաշքյոյ գյուղով, ուր նա թաղված է։

Բյուզանդիայի Լևոն V կայսեր 816 թ. վերանորոգել տված Կամառախ²⁰ բնակավայրը ևս Պիզուի և Արկագիուպոլիսի պես պիտի գտնվեր Կեսարիայի Արգեոս լեռան շրջակայքում։ Արգեոս լեռան հարավային ստորոտում մեր բարտեզում նշված է XIX դարի հայկական «Կամարայ եկեղեցին»։ Ահա այդտեղ պետք է լինի IX դարի Կամառախ բնակավայրը։ Թեև Կամառախի անունը հիշեցնում է Կեսարիայի հյուսիս-արևելյան կողմում, դեպի Սևբաստիա տանող ճանապարհի վրայի Կեմերեկ շրջանի անունը, սակայն դա հայերեն Գամիրք տեղանվան աղավաղված ձևն է։

Արգեոս լեռը հրաբխային բնույթ ունի և լրիվ չի հանգած։ Վերոհիշյալ վայրերը քանիցս ավերվել են Արգեոս լեռան գործունեության հետևանքով²¹։ Մի քանի տվյալներ այդ մասին։

17 թ. — Կրակ ժայթքեց Արգեոս լեռը, Կեսարիան և Փոքր Ասիայի 14 մեծագույն քաղաքներ կործանվեցին։ Կապադովկիան, Կիլիկիան և Արևմուտյան Փոքր Ասիան մեծապես վնասվեցին։

138—161 թթ. միջև կործանարար երկրաշարժներ Կապադովկիայում։

233—269 թթ. միջև մեծ երկրաշարժ Կապադովկիայում։

453 թ. — Մեծ երկրաշարժ Կապադովկիայում²²։

23/9 1063 թ. — Կործանարար մեծ երկրաշարժ Կապադովկիայում²³։

1205 և 1835 թթ. — երկրաշարժեր Կեսարիայում։

1940 թ. — Երկրաշարժ Բոր, Կեսարիա և Դեվելի քաղաքներում²⁴։

Երկրի կեղևի ճեղքվածքներից մեկը անցնում է Արգեոս լեռան վրայով,

¹⁹ Սմբատ Սպարապետ, էջ 86։ Մ. Ուռհայեցի, էջ 219։

²⁰ Ասողիկ, էջ 143։

²¹ Ա. Ալպոյաճեան, նշվ. աշխ., էջ 9—17։

²² Նույն տեղում, էջ 300։

²³ Նույն տեղում, էջ 464։

²⁴ Şk'ın Nuriye Pinar, Ervin Lahn, Türkiye depremleri izahlı katalogu, Ankara 1952.

խակ երկրորդը՝ Ինճեսուով և երկուսը իրար զուգահեռ իջնում են դեպի հարավ: Դեվելին երկրաշարժերից մասամբ ավերված քաղաք է: Ինճեսուն, Հաճըլարը ցնցումներ կրած բնակավայրեր են: Էվերեկը, որը հայերի Ավերակն էր, նույնպես անցյալում երկրաշարժերից ավերված բնակավայր է Լոկլի: Մի խոսքով, Գագիկ II-ի տիրույթը ամբողջությամբ գտնվում էր երկրագնդի կեղևի ճեղքվածքի գծի վրա և հրաբխային Արգեոս լեռան անմիջական մերձավորությամբ²⁵:

Գագիկ II-ի տիրույթի դիրքը որոշվելուց հետո պարզվում է, որ Կիլիկիայի Ռուբինյան իշխանության հիմնադիր Ռուբենի Կոստառա բերդը (այժմ՝ Զյուրյուկ կայն) գտնվում էր Գագիկ Աբասյանին պատկանող հուվատաներին սահմանակից, նրանից արևելք ընկած Պիղոսից և Կալոն Պաղատից 65—70 կմ հեռու մի վայրում: Գագիկ II-ի և Ռուբենի տիրույթների միջև Գագիկ Աբասյանի տիրույթն էր: Սրանով էլ կասկածի տակ է ընկնում Գագիկ II-ի և Ռուբենի աղղակցական կապի կամ մերձավորության հարցը: Անհրաժեշտ է վերաքննել Ռուբենի՝ դեռ Կոստառա բերդի տեր եղած ժամանակաշրջանի վասալական կախման հանգամանքները:

Գագիկ II-ի սպանվելուց և Պիղոսի Ս. Խաչ վանքում թաղվելուց հետո էլ այնտեղ հայ բնակչությունն է եղել: Բավական ժամանակ վանքը շարունակել է պահպանել իր գոյությունը: Բյուզանդիայի Ալեքս կայսերը (1080—1118 թթ.) նկատի ունենալով Վարդան Բարձրբերդցին դրում է. «Յորում աւուր եղեւ նշան ինչ սոսկալի ՚ի վանքն Պիղոյ գոր շինեաց Գագիկ արքայ»²⁶: Հիշյալ «սոսկալի նշանը» այն էր, որ եկեղեցու սրբություններից մեկը ընկել էր գետին ու կանթեղի լույսը չէր մարել:

Նվրոպացի պատմագիրները նշել են, թե առաջին խաչակիրների արշավանքի ժամանակ (1096 թ.) հավատանքը (Gabadonia) եղել է հայաշատ (terre des Arméniens) երկրամաս²⁷: Դրանից հետո էլ դարեր շարունակ Փոքր Հայքը հայաբնակ է եղել:

Սրանից ճիշտ 900 տարի առաջ իր մայրամուտին էր հասել Հայաստանի Բագրատունիների հարստությունը: Մեկ տարի անց Լեոնային Կիլիկիայում, Տավրոս լեռների Կառմոզդուլո գյուղում, Ռուբեն I-ը դառնալու էր Կիլիկիայի հայկական պետության և Ռուբինյանների իշխանական տան հիմնադիրը:

ГОРОД ПИЗУ ГАГИКА II БАГРАТУНИ

М. Г. ДЖЕВАНРДЖЯН

(Резюме)

В статье уточняется местоположение средневекового каппадокийского города Пизу, принадлежавшего Гагику II, последнему царю из династии армянских Багратидов, и местоположение монастыря Сурб Хач в Пизу, где был похоронен царь Гагик.

²⁵ Կեոսրիայի երկրաշարժերի մասին տե՛ս Ա. Ալպոյաճյան, Պատմություն հայ Կեոսրիո, Ա, էջ 713:

²⁶ Վարդան Բարձրբերդցի, էջ 140:

²⁷ „Histoire anonyme de la première croisade“, trad. franç. de L. Bréhier, Paris, 1924, էջ 60—61: Nicole et Michel Thierry, Nouvelles églises rupestres de Cappadoce, Région du Hasan dağı, Paris, 1963, էջ 129: